

諸師聖誕沖舉酌獻儀

玉帝聖誕酌獻儀 正月初九日

虹流藹瑞 瞻香案於吳天 鵠立馳誠 薦芳罇於福地 恭炷道

德真香 虔誠奏啟供養

太上開天執符御曆含真體道昊天玉皇大天尊玄穹高上帝

光嚴妙樂國王聖父天尊

寶月光皇太后聖母元君

金闕彌羅聖眾

玉京侍衛高真

悉仗真香 普同供養 再炷真香 奏啟供養

虛無自然三清三境天尊

北極紫微大帝

南極天皇帝

承天效法后土皇地祇

三界萬靈 十方真宰

是日 朝賀一切真靈 恭望洪慈 俯垂洞鑑

諸師聖誕沖舉酌獻儀

清微藏書閣

宣意

伏以 大道無形 妙萬物而資始 至真罔象 制群品以御圖

妙用難窺 靈機莫測 庸假無文之敬 式殫慶聖之恭 恭惟

昊天玉皇大天尊玄穹高上帝

天地同明 日月合德 浮黎真境 記傳受道之初 紫微上宮 顯示

度人之旨 出寶書於天篆 發金紐於霞文 乃大梵之天章 實諸天

之隱韻 煥爾不言之教 超乎無朕之機 八角垂芒 孰窺浩劫 二

儀應運 莫測真源 允希監宥之私 少副依歸之志 諸天慶會 三

境非遙 玉樹仙花 睇玉虛之咫尺 琅輿碧輦 演瓊韻以雍容 謹

運虔恭 禮伸初獻

伏以 鬱羅蕭臺 現有為之梵相 溟滓大梵 具無極之神通

斯玄祖之靈樞 實穹皇之要旨 昏衢慧燭 溟渤舟航 上則安國康

民 下而扶危度厄 拯提趣類 絕智愚高下之分 敷暢真玄 破無

有色空之礙 顧惟菲薄 莫匪甄陶 伏念 某等餐聽法音 普沾聖

澤 聞演說而歎希有 益開悟而感弘慈 洵逢降世之佳辰 用謹朝

元於平旦 如無邊明鏡 在供養尊禮以奚為 若大音洪鍾 雖寂寞

扣求而必應 不遺再瀆 尚賜居歆 再拜上香 禮伸二獻
伏以 妙有真境 普示現國王之身 彌羅上宮 即根本帝尊之
位具一氣胚胎之萃 全三光浩渺之真 妙德難思 神通莫議 隱隱
玉京之上 巍巍金闕之高 五千秘言 融三才之大道 八千餘度
接六趣之眾生 自然而然 非識可識 定而能應 去來自在 以無
拘合而可分 變化圓通而莫測 演清淨解脫之旨 濟沈迷憂苦之途
周遊於三境之中 溥現於十方之上 伏願 不違童瀆 惟簡帝心
鑑齋戒沐浴之虔 開覆燾載持之造 照臨有赫 喜慶難言 傾倒
虔恭 禮終三獻

宣疏

回向

伏願 天聽惟明 帝心有鑒 長而不宰 與天地以為宗 仰之

彌高 超形名而獨立 恩全民物 澤被邦家

祖天師誕辰 正月十五日

天上蘅薇 記千載生仙之旦 人間蕉荔 表一時慶聖之心 恭炷真

香 供養祖師

諸師聖誕沖舉酌獻儀

清微藏書閣

三天扶教輔元體道大法天師

正一沖玄神化靜應顯佑真君

六合無窮高明大帝降魔護道天尊

聖祖漢師相留文成侯正一聖父桐柏真人

正一聖母元君

嗣師太清演教妙道真君

系師太清昭化廣德真君

正一女師元君

左右侍宸王趙二真人

正一文姬仙女

文光仙女

玉蘭仙女

芳芝仙女

奉車都尉樓亭侯

義陽太守閻中侯

南郡太守侍御史

正一歷代天師真人元君仙姑仙祖仙宗飛騰仙眷
本觀香火高真
雷霆法部官將真官
土地江東之神

三界朝賀 一切真靈 悉運真香 普同供養

宣意

伏以 啟運鶴鳴 丕闡無窮之靈化 分榮魚鬣 誕膺太上之休
光 由漢室以著稱 繼留侯而濟美 山林瞻仰 海宇歸崇 恭惟祖
師正一真君 正一之宗 玄元之主 代天濟世 以寶籙而傳後人
度地修真 養金丹而成大道 印劍之纂承悠遠 功行之表著恢弘
綠輦丹輦 感金闕至真之降 龍章鳳篆 探紫陽內典之藏 奉聖朝
褒錫之尊 見師造覆持之廣 神風遐著 紫霧彌羅 龍戲麟盤
仰翩翩而下逮 鸞鳴鳳唱 斯秩秩以居歆 輒運虔恭 禮伸初獻
伏以 天為星辰 地為河嶽 關百世之盛衰 衣之冠冕 水之
本源 寄後人之瞻仰 三天具慶 四海歡騰 自惟至道儲精 寔乃
先天毓秀 流芳根本 茂枝葉以光榮 沃潤山林 如草木之衣被

諸師聖誕沖舉酌獻儀

清微藏書閣

伏念 某等仰依師廕 寓處琳庭 每依倣以有懷 惟奉持而弗替
尚監勤拳之至 俯垂享格之私 休有烈光 洞融妙義 天顏有喜
春浮芝臉以增輝 雲氣祥光 日近薇垣而藹瑞 際會風雲於天上
近瞻日月於人間 再運丹衷 禮伸二獻
伏以 六鼇駕山 雙鳳扶輦 洵惟慶誕之良時 五老啟途 群
仙翼轅 用致贊揚於今日 轉鈞有造 覆錦惟懷 巍乎泰省之崇
翊此清門之化 無往不在 與時偕行 魚鬣端披 喜共睹天人之相
虬髯正視 若再瞻日月之光 方蘅薇之香氣 又新念葵藿之丹誠
難泯三薰 益謹百拜 惟恭 奉疏牘以敷言 潔壽解而稱頌 恩
庥知自 悃款奚殫 伏願 鑑行潦之微芹 沃餘波於奕葉 明明在
上 永垂耀於真風 赫赫厥靈 尚依光於化日 德輝無盡 仙道彌
昌 傾倒虔恭 禮終三獻

宣疏

回向

伏願 執道之樞 與天同運 教宗蒙潤 魚衣承雨露之恩 帝
所垂光 鳧鳥履星辰之上 琳庭清肅 道眾安和

道祖降誕獻文 二月十五日

大道無名 式際降生之旦 至神有赫 庸殫慶贊之誠 恭炷道德

真香 虔誠奏啟供養

太清仙境太上老君道德天尊

混元上德皇帝

恭望道慈 洞回昭鑑 再運真香 虔誠奏啟 供養

玉清元始天尊

上清靈寶天尊

金闕諸天上帝

大羅妙有高真

法主玄天上帝

祖師正一真君

三界十方千真萬聖

雷霆法部官將

江東土地之神

是日 朝賀一切真靈 悉運真香 普同供養

諸師聖誕沖舉酌獻儀

清微藏書閣

宣意

伏以 生無始而隨無終 玄通冥寂 可常名而非常道 清淨自

然稟妙氣於玉虛 現粹容於神室 恭惟

太上老君混元皇帝 主玄元教居太赤天 立民物而運乾坤 宰陰陽

而行日月 甄陶品類 拯濟顯幽 方青陽時序之中 乃紫府真元之

節 九清慶洽 三極祥開 流瑞藹於玄樞 煥靈光於壽域 爰伸賀

悃 敬奉慶儀 白鹿引車 若光臨於漢室 青牛擁駕 猶下逮於周

朝 謹運丹衷 禮伸初獻

伏以 九龍擁瑞 紀毓聖之昌辰 八鸞同鳴 游迎真於穀旦

闡揚大化 演繹靈音 儼日淵月角之尊 仰天步星行之道 綱維萬

化宰制三才 伏念 某等職守琳庭 率循科範 奉清光而對越 瞻

紫氣以彌高 戒蓬島之羽流 潔林居之藻薦 祇修玄典 仰冀鑑觀

自本自根 等乾坤而同久 非空非色 超象數以獨尊 再運丹衷

禮伸二獻

伏以 金簡玉書 闡神真於三洞 父言聖訓 垂道德於千齡

誕揚清淨之風 茂啟希夷之化 開雲弁霞裾之緒 發赤書玉字之玄

教被中華 恩周下土 關令方深於望氣 天人有待於傳經 搏不
得聽不聞 雖大道獨超乎語嘿 存者神 過者化 惟盛德則可以形
容 何以贊揚 第勤薰沐 伏願 先天傳道 浩劫指迷 長為下土
之津梁 悉化群黎於方域 馴至空同之問 自無姑射之疵 道統儲
祥 琳庭協慶 傾倒虔恭 禮終三獻

誦經

宣疏

回向

月惟春仲 風光已及於花辰 壽與天齊 道德斯臨於仙旦 諸天同
慶 三界均歡 伏願 玉几高明 丹扃通徹 國家寧一 遵道德之
常經 天地後先 超形名而獨立 各諧清淨 共底雍熙 伏願 道
尊德貴 林泉永樂於昇平 日富月昌 雨露均沾於化育

高真降誕

三月三日

三月三日 正蘭亭修楔之辰 一德一心 慶金闕化身之聖 恭炷真

香 虔誠供養

萬法教主玉虛師相玄天上帝

諸師聖誕沖舉酌獻儀

清微藏書閣

金闕化身蕩魔天尊

聖父淨樂天君明真大帝

聖母善勝天后瓊真上仙

聖師豐乾大帝

祖天師泰玄上相正一真君

虛危二宿星君

應化武曲星君

文昌梓潼帝君

武當山得道五佰靈官

北極佑聖府天乙真慶宮元和遷校府官君將吏

觀庭香火高真

雷霆法部官將真官

土地江東之神

是日朝賀三界真靈

玄虛過往糾察真司

悉仗真香

普同供養

宣意

伏以 夢日儲祥 慶玄天而應化 披雲望幸 伏厚地以陳情
諸天齊臨 萬神唱奉 恭惟 教主玄天上帝 得天之道 執帝之符
淨樂孕靈 鍾五嶽三光之間炁 虛危應宿 合九霄八景之元和
宜尊居北極之高 益光贊東吳之盛 屢沐聖朝之華袞 誕臻人世之
葵傾 細酌流霞 順下風而獻奠 庸修澗藻 祈上聖以光臨 謹運
丹衷 禮伸初獻
伏以 玉虛師相 仰北極之崇高 金闕真尊 寄後人之瞻睹
靈光奕奕 聖德巍巍 然有願以皆從 故無幽而不燭 魁罡激指
掃妖魔於六洞之中 人鬼分離 著功行於七日之內 顯幽俱泰 今
古攸遵 伏念 某等叨沐甄陶 惟深慶贊 行藏用舍 莫非聖訓之
依 覆燾匡扶 所異靈休之及 游逢此日 再啟玄風 輒陳潢潦之
儀 以答鴻龐之貺 不違童瀆 尚鑒時忱 瑤珮瓊裾 下雲霄之浩
蕩 金錢寶馬 略塵世之恭虔 再運虔誠 禮伸二獻
伏以 瀆則不告 敢忘慶賀之私 感而遂通 仰藉好生之德
神洋洋乎如在 皇剡剡兮揚靈 第切瞻依 肅嚴獻奠 伏望 迂臨
下土 惠鑒微忱 蘋藻將誠 三侑殷勤之禮 山林多幸 一瞻只尺

諸師聖誕沖舉酌獻儀

清微藏書閣

之光 庸罄一忱 禮終三獻

誦經
宣疏
回向

春日融融 開遍上林之桃李 天顏穆穆 敬修南澗之蘋蘩 萬倍歡
榮 一誠慶賀 伏願 高真洞鑒 列聖垂慈 格一念之精誠 錫九
疇之洪範 冠裳興盛 琳宇昌安

高真祖師沖舉獻文 九月九日

乘雲謁帝 當九日之再臨 酌水朝真 仰三天之孔邇 恭炷真香
虔誠供養

祖天師三天扶教輔元體道大法天師

正一冲玄神化靜應顯佑真君

六合無窮高明大帝

降魔護道天尊餘聖位 同前 再炷真香 供養

萬法教主玉虛師相玄天上帝

金闕化身蕩魔天尊

聖父淨樂天君明真大帝
聖母善勝天后瓊真上仙
武當山得道靈官聖眾
觀庭香火高真
雷霆法部官將真官
土地江東之神

是日 朝贊一切真靈 悉仗真香 普同供養

宣意

伏以 玉珮秋風 記重陽之昇舉 金莖曉露 對佳節以獻酬
諸天下臨 萬神唱奉 恭惟祖天師正一真君 執天之樞 與天同運
瑤峰玉局 親傳九鼎之書 絳節霓旌 光被三天之詔 由漢室龍
興之世 至蜀都鶴去之時 益衍宗風 光于今日 載惟法主玄天上
帝得天之道 執帝之符 淨樂孕靈 鍾五嶽三光之間氣 奎婁應宿
合九霄八景之元和 宜尊居北極之高 益光贊東吳之盛 俱沐聖
朝之華袞 誕臻人境之葵傾 細把茱萸 順下風而獻奠 庸修蘋藻
祈上聖以光臨 謹運丹衷 禮伸初獻

諸師聖誕沖舉酌獻儀

清微藏書閣

伏以 紫芝眉宇 仰師省之崇高 玄武旌旗 寄後人之瞻睹
靈光奕奕 天視昭昭 蓋與時以偕行 乃無幽而不察 鹿堂鹽井
著功行於豐碑 鍼澗榔梅 重懷恩於下土 無窮傾慕 敢後朝修
伏念 某叨沐甄陶 惟深慶贊 行藏用舍 莫非聖訓之依 覆燾匡
扶 所冀靈庥之被 荐逢此日 再啟玄風 輒陳潢潦之儀 以答鴻
庀之貺 不違童瀆 尚鑒時忱 瑤珮瓊裾 下雲霄之浩蕩 寒泉秋
菊 略塵世之恭虔 再運丹衷 禮伸二獻
伏以 鸞書鳳誥 承三天眷命之隆 羽葆霓旌 際九日昇真之
會 神洋洋在上 皇剡剡兮揚靈 乘白雲至帝鄉 功成別館 受
素書傳真訣 威制群魔 綿數千百年正一之傳 恢二十八治宗風之
盛 化巢之功勳 若被鎮天之威武 非虛莫既贊 宣肅嚴獻奠 伏
望 迂臨下土 惠鑒微忱 茱菊流芳 三侑殷勤之禮 山林多幸
一瞻只尺之光 庸罄一忱 禮終三獻

宣疏

回向

鸞鶴浮空 降威容於只尺 冠裳列序 致禮敬於再三

八表秋清 諸天雲會 伏願 歆格微誠 顯敷大教
傳經玉局 永光道德之宗 主法玄天 茂衍彪鴻之慶
琳庭清肅 道眾和安 神靈孚佑 教弘道德之光
儀相崇嚴 運啟雍熙之治 冠裳興盛 琳宇昌安

諸師聖誕沖舉酌獻儀竟

天運壬辰年辰月正一天師清微弟子洪鼎堅羅大英恭錄彙編

蔣科靜複校

諸師聖誕沖舉酌獻儀

清微藏書閣